

Newspaper	UTUSAN MALAYSIA
Date	22 APRIL 2015

Beri perhatian 4 aspek sebelum keluar fatwa

Um - 22/4/2015

KUALA LUMPUR 21 April - Para mufti atau kelompok pengeluar fatwa perlu memberi penekanan dan perhatian terhadap empat aspek utama sebelum mengeluarkan sesuatu hukum atau fatwa.

Pengerusi Institut Kefahaman Islam Malaysia (IKIM), Tun Abdullah Ahmad Badawi berkata, aspek tersebut ialah penguasaan sumber agama terhadap sesuatu persoalan, penggunaan kaedah dalam mengeluarkan hukum, menguasai suasana lingkungan terhadap isu baharu dan mengaplikasikan hukum umum daripada sumber asal menggunakan kaedah yang betul ke atas kes baharu.

“Pengeluaran sesuatu fatwa semasa juga terutama yang berkaitan dengan bidang-bidang teknikal harus bermula dengan penyelidikan mendalam sebelum sesuatu hukum dikeluarkan.

“Pelbagai syarat ketat untuk membolehkan seseorang berijtihad atau memberi fatwa yang bertujuan memastikan fatwa yang dikeluarkan itu berkualiti,” katanya semasa berucap merasmikan Majlis Persidangan Meja Bulat Pemerikasaan Institusi Kefatwaan: Mendepani Cabaran Sebagai Sumber Rujukan Syariah Di Malaysia di sini hari ini.

Yang turut hadir, Mufti Kerajaan Negeri Melaka, Datuk Dr. Mohd. Mohadis Yasin; Mufti Sabah, Datuk Bungsu @ Aziz Jaafar dan Mufti Perak, Tan Sri Dr. Harussani Zakaria.

Menurut Abdullah, institusi fatwa merupakan satu institusi penting dalam menyampaikan kefahaman Islam yang sebenar kepada masyarakat Islam terutama persoalan berkaitan hukum-hakam.

“Kepentingan fatwa dapat dilihat berdasarkan perkembangan hal ehwal kehidupan manusia yang begitu pesat dengan sebahagiannya menyentuh hal berkaitan hukum-hakam keagamaan,” katanya.

Sementara itu, Ketua Pengarah IKIM, Datuk Nik Mustapha Nik Hassan berkata, perbincangan ilmiah dalam kalangan cendekiawan Islam perlu dilakukan bagi mendidik umat Islam mengenai isu-isu kefatwaan semasa supaya mereka dapat memahami tujuan sebenar fatwa yang dikeluarkan.

Menurutnya, tanpa kefahaman yang betul, fatwa-fatwa yang dikeluarkan hanya akan menimbulkan polemik dan fitnah kepada para mufti dan lebih teruk memberi kesan terhadap kesucian agama.

“Walau bagaimanapun, isu kurang utama perlu dielak agar polemik tidak berguna serta membuang masa tidak ditimbulkan dalam masyarakat.

“Umat Islam harus memastikan prinsip-prinsip asas dalam agama tidak dikompromikan semata-mata untuk menyantuni kehendak pihak yang berkepentingan,” katanya.



ABDULLAH AHMAD BADAWI bersalam dengan **Dr. Harussani Zakaria** di Dewan Besar IKIM, Kuala Lumpur, semalam. - UTUSAN/JEFFRI IRAN